

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৪৫/২০১৭-১৮

ঢাকা, বৃহস্পতিবার ৭ সেপ্টেম্বর ২০১৭, ২৩ ভদ্র ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। প্রধানমন্ত্রীর সঙ্গে জাতিসংঘের বিদায়ী আবাসিক প্রতিনিধির সাক্ষাৎ
: রোহিঙ্গাদের দেশে ফেরাতে জাতিসংঘের পদক্ষেপ কামনা
- ২। রাখাইন রাজ্যে চলমান সহিংসতায় মায়ানমারের রাষ্ট্রদূতকে ডেকে বাংলাদেশের প্রতিবাদ
- ৩। রোহিঙ্গাদের ওপর সহিংসতা বন্ধে সব দেশের এগিয়ে আসা উচিত : বাণিজ্যমন্ত্রী
- ৪। পালিয়ে আসা রোহিঙ্গাদের স্বাস্থ্যসেবা দিতে পৃথক মেডিকেল টিম গঠনের নির্দেশ স্বাস্থ্যমন্ত্রীর
- ৫। প্রাকৃতিক দুর্যোগ মোকাবিলায় সরকার প্রস্তুত : প্রধানমন্ত্রী
- ৬। বাংলাদেশে জাতিসংঘ সহযোগিতা বাড়াবে : অর্থমন্ত্রীকে ইউনিডো'র ডিজি
- ৭। শিল্পমন্ত্রীর সাথে ইউনিডো ডিজি'র সাক্ষাৎ : ই-বর্জ্য ব্যবস্থাপনায় সহায়তার আশ্বাস
- ৮। সরকার দুই হাজার ভূমিঅফিস নির্মাণ করবে : ভূমিমন্ত্রী
- ৯। দেশে সাক্ষরতার হার ৭২ দশমিক ৩ শতাংশ : গণশিক্ষা মন্ত্রী
- ১০। বিদ্যুতের দাম ৫ শতাংশ বাড়তে পারে : বিদ্যুৎ প্রতিমন্ত্রী

১। প্রধানমন্ত্রীর সঙ্গে জাতিসংঘের বিদায়ী আবাসিক প্রতিনিধির সাক্ষাৎ

: রোহিঙ্গাদের দেশে ফেরাতে জাতিসংঘের পদক্ষেপ কামনা

মায়ানমারের রাখাইন রাজ্যে সহিংসতার কারণে পালিয়ে আসা শরণার্থীদের দ্রুত দেশে ফেরাতে জাতিসংঘের পদক্ষেপ চেয়েছেন প্রধানমন্ত্রী শেখ হাসিনা। এ ব্যাপারে মিয়ানমারের ওপর চাপ সৃষ্টি করতে আন্তর্জাতিক মহলের প্রতি আবারও আহ্বান জানিয়েছেন তিনি। বাংলাদেশে জাতিসংঘের আবাসিক প্রতিনিধি রবার্ট ডি ওয়াটকিনস গতকাল ৬ সেপ্টেম্বর বুধবার বিদায়ী সাক্ষাৎ করতে প্রধানমন্ত্রীর কার্যালয়ে গেলে প্রধানমন্ত্রী বলেন, মায়ানমারের নাগরিকদের যেন দেশে ফিরিয়ে নেওয়া হয়, সেজন্য জাতিসংঘের দ্রুত কার্যকর পদক্ষেপ নেওয়া প্রয়োজন। রাখাইনে সহিংসতা বন্ধ করতেও মায়ানমারের ওপর চাপ সৃষ্টি করতে হবে। সূত্র-সমকাল (পৃ.১,ক.৬), ইত্তেফাক (পৃ.১,ক.৫), এশিয়ান এজ (পৃ.১,ক.৩), অবজারভার (পৃ.১,ক.১)।

২। রাখাইন রাজ্যে চলমান সহিংসতায় মায়ানমারের রাষ্ট্রদূতকে ডেকে বাংলাদেশের প্রতিবাদ

মায়ানমারের রাখাইন রাজ্যে রোহিঙ্গা মুসলিমদের বিরুদ্ধে ব্যাপক সহিংসতা ও চলমান সেনা অভিযান এবং বাংলাদেশে অপ্রত্যাশিতভাবে অত্যধিক রোহিঙ্গা প্রবেশ করার ঘটনায় মায়ানমারের ভারপ্রাপ্ত রাষ্ট্রদূত অং মিন্টকে আবারও তলব করে প্রতিবাদ জানিয়েছে বাংলাদেশ। গতকাল ৬ সেপ্টেম্বর বুধবার পররাষ্ট্র মন্ত্রণালয়ের দক্ষিণ-পূর্ব এশিয়া অনুবিভাগের মহাপরিচালক মঞ্জুরুল করীম তাঁকে তলব করেন। এ বিষয়ে তাঁকে একটি অনানুষ্ঠানিক পত্রও হস্তান্তর করা হয়। পত্রে রোহিঙ্গাদের সুরক্ষা এবং বাংলাদেশে অবস্থানরত সব রোহিঙ্গাকে প্রত্যাগমনে পদক্ষেপ নেওয়ার জন্য মায়ানমার সরকারকে আহ্বান জানানো হয়। এছাড়া মায়ানমার সীমান্তে ল্যান্ডমাইন স্থাপনের বিষয়েও প্রতিবাদ জানানো হয়। সূত্র-সংবাদ (পৃ.১,ক.১), ভোরের কাগজ (পৃ.২,ক.২), এশিয়ান এজ (পৃ.১,ক.১), অবজারভার (পৃ.১,ক.১)।

৩। রোহিঙ্গাদের ওপর সহিংসতা বন্ধে সব দেশের এগিয়ে আসা উচিত : বাণিজ্যমন্ত্রী

মায়ানমারের রাখাইন রাজ্যে রোহিঙ্গাদের ওপর সহিংসতা বন্ধে আন্তর্জাতিক চাপ বাড়ানোর আহ্বান জানিয়েছেন বাণিজ্যমন্ত্রী তোফায়েল আহমেদ। তিনি বলেন, রোহিঙ্গাদের ওপর অমানবিক নির্যাতন কোনো সভ্য দেশ সমর্থন করতে পারে না। ইতোমধ্যে ইন্দোনেশিয়া, মালয়েশিয়া, মালদ্বীপ, তুরস্কসহ বিভিন্ন দেশ মানবিক দৃষ্টিভঙ্গি থেকে বিষয়টিকে দেখতে শুরু করেছে। রোহিঙ্গাদের রক্ষায় সব দেশের এগিয়ে আসা উচিত। গতকাল ৬ সেপ্টেম্বর বুধবার বাণিজ্য মন্ত্রণালয়ের সভাকক্ষে এক অনুষ্ঠানে মন্ত্রী এসব কথা বলেন। সূত্র-সমকাল (পৃ.২,ক.১), জনকণ্ঠ (পৃ.১,ক.৩), এশিয়ান এজ (পৃ.১২,ক.১), অবজারভার (পৃ.১০,ক.২)।

৪। পালিয়ে আসা রোহিঙ্গাদের স্বাস্থ্যসেবা দিতে পৃথক মেডিকেল টিম গঠনের নির্দেশ স্বাস্থ্যমন্ত্রীর

মায়ানমারের রাখাইন রাজ্য থেকে পালিয়ে আসা শরণার্থী রোহিঙ্গাদের স্বাস্থ্যসেবা নিশ্চিত করার নির্দেশ দিয়েছেন স্বাস্থ্যমন্ত্রী মোহাম্মদ নাসিম। গতকাল ৬ সেপ্টেম্বর বুধবার চট্টগ্রাম বিভাগীয় পরিচালক (স্বাস্থ্য) এবং কক্সবাজার জেলা সিভিল সার্জনকে ফোন করে মন্ত্রী এ নির্দেশ দেন। স্বাস্থ্যমন্ত্রী মোহাম্মদ নাসিম বলেন, পালিয়ে আসা শরণার্থী এসব রোহিঙ্গা জনগোষ্ঠীর বিষয়টি সরকার মানবিক দৃষ্টিতে দেখছে। তারা যাতে সঠিক স্বাস্থ্যসেবা পায় সে জন্য সংশ্লিষ্টদের নির্দেশ দেওয়া হয়েছে। পৃথক মেডিকেল টিম গঠন করে ক্যাম্পের পাশাপাশি তাদের অবস্থানকারী এলাকায় চিকিৎসকরা চিকিৎসাসেবা নিশ্চিত করবেন। সূত্র-সমকাল (পৃ.২,ক.৮),

৫। প্রাকৃতিক দুর্যোগ মোকাবিলায় সরকার প্রস্তুত : প্রধানমন্ত্রী

প্রধানমন্ত্রী শেখ হাসিনা দুর্যোগ ব্যবস্থাপনা প্রস্তুতির ওপর গুরুত্বারোপ করে বলেছেন, দুর্যোগকালে প্রস্তুতি ভালো থাকলে ক্ষয়ক্ষতির পরিমাণ অনেক কম রাখা সম্ভব হয়। তিনি বলেন, ভৌগোলিক অবস্থানের কারণেই বাংলাদেশ একটি দুর্যোগপ্রবণ দেশ। আমাদের এই প্রাকৃতিক দুর্যোগের সঙ্গেই বসবাস করতে হবে। কাজেই সঠিক পরিকল্পনা থাকলে জানমালের ক্ষয়ক্ষতি সীমিত রাখা সম্ভব। তিনি গতকাল ৬ সেপ্টেম্বর বুধবার তাঁর কার্যালয়ে

জাতীয় দুর্যোগ ব্যবস্থাপনা কাউন্সিলের সভায় একথা বলেন। সূত্র-সংবাদ (শেষ পৃ.,ক.১), জনকণ্ঠ (পৃ.১,ক.১), এশিয়ান এজ (পৃ.১৬,ক.৪), অবজারভার (পৃ.১৬,ক.১)।

৬। **বাংলাদেশে জাতিসংঘ সহযোগিতা বাড়াবে : অর্থমন্ত্রীকে ইউনিডো'র ডিজি**

ঢাকা সফররত জাতিসংঘের শিল্প উন্নয়ন বিষয়ক সংস্থার (ইউনিডো) মহাপরিচালক লি ইয়ং গতকাল ৬ সেপ্টেম্বর বুধবার অর্থমন্ত্রী আবুল মাল আবদুল মুহিতের সঙ্গে সাক্ষাৎ করেন। রাজধানীর ঢাকা ক্লাবে আয়োজিত এ সাক্ষাৎ অনুষ্ঠানে তাঁদের মধ্যে পারস্পরিক স্বার্থসংশ্লিষ্ট বিষয়ে আলোচনা হয়। আলাপকালে ইউনিডো'র মহাপরিচালক বাংলাদেশের উন্নয়নে তাঁদের সহযোগিতা আরো বাড়বে বলে আশ্বাস দেন। তিনি বলেন, বিভিন্ন সংস্থার মাধ্যমে জাতিসংঘ বাংলাদেশের উন্নয়নে সহযোগিতা করে থাকে। ভবিষ্যতে এ সহযোগিতা আরো বাড়বে। এ সময় তিনি বাংলাদেশের অর্থনৈতিক উন্নয়নের প্রশংসা করেন। সূত্র-ইত্তেফাক (পৃ.১৮,ক.৬), জনকণ্ঠ(পৃ.১৫,ক.১), এশিয়ান এজ (পৃ.৩,ক.১), অবজারভার (পৃ.১৭,ক.১)।

৭। **শিল্পমন্ত্রীর সাথে ইউনিডো ডিজি'র সাক্ষাৎ : ই-বর্জ্য ব্যবস্থাপনায় সহায়তার আশ্বাস**

বাংলাদেশে ইলেক্ট্রনিক বর্জ্য (ই-বর্জ্য) ব্যবস্থাপনায় জাতিসংঘের শিল্প উন্নয়ন সংস্থা (ইউনিডো) কারিগরি সহায়তা দেবে বলে জানিয়েছেন সংস্থার মহাপরিচালক লি ইয়ং। এ ছাড়া, কৃষিভিত্তিক শিল্পের প্রসার, জ্বালানি দক্ষতা বৃদ্ধি ও পরিবেশবান্ধব শিল্পায়নে সংস্থাটির পক্ষ থেকে সহায়তা করার কথাও বলেছেন তিনি। ঢাকা সফররত ইউনিডোর মহাপরিচালক গতকাল ৬ সেপ্টেম্বর বুধবার শিল্পমন্ত্রী আমির হোসেন আমুর সঙ্গে বৈঠককালে এসব কথা জানান। শিল্প মন্ত্রণালয়ে অনুষ্ঠিত এ বৈঠকে শিল্পখাতে ইউনিডোর সহায়তা নিয়ে বিস্তারিত আলোচনা হয়। এ সময় স্থানীয় কৃষিভিত্তিক শিল্পের ভ্যালু চেইন উন্নয়ন, ট্যানারির কঠিন বর্জ্য ও দূষিত পানি ব্যবস্থাপনা, স্বল্প কার্বন নির্গমন, কৃষিপণ্য প্রক্রিয়াজাতকরণ, পাটজাত পণ্যের বহুমুখীকরণে কারিগরি সহায়তা প্রদানসহ অন্যান্য বিষয়ে আলোচনা হয়েছে। সূত্র-সমকাল (পৃ.১০,ক.৮), সংবাদ (পৃ.১৪,ক.২), এশিয়ান এজ (পৃ.১১,ক.৪), অবজারভার (পৃ.৪,ক.৬)।

৮। **সরকার দুই হাজার ভূমিঅফিস নির্মাণ করবে : ভূমিমন্ত্রী**

ভূমিমন্ত্রী শামসুর রহমান শরীফ বলেছেন, চলতি বছরের মধ্যে এক হাজার ভূমিঅফিস নির্মাণের কাজ সম্পন্ন করা হবে এবং আরও ২ হাজার ভূমিঅফিস নির্মাণ বর্তমান সরকারের মেয়াদকালেই সম্পন্ন হবে। গতকাল ৬ সেপ্টেম্বর বুধবার পাবনার ঈশ্বরদীর লক্ষীকুণ্ডা ইউনিয়ন ভূমিঅফিস এবং পাকশী ইউনিয়ন ভূমিঅফিস উদ্বোধনকালে ভূমিমন্ত্রী এসব তথ্য জানান। সূত্র-জনকণ্ঠ (পৃ.৩,ক.৬), ডেইলি সান (পৃ.১২,ক.২), ডেইলি স্টার (পৃ.৩,ক.৮)।

৯। **দেশে সাক্ষরতার হার ৭২ দশমিক ৩ শতাংশ : গণশিক্ষা মন্ত্রী**

সরকারের নানামুখী কর্মসূচির কারণে বাংলাদেশ পরিসংখ্যান ব্যুরোর সর্বশেষ তথ্য অনুযায়ী বাংলাদেশে বর্তমানে সাক্ষরতার হার ৭২.৩ শতাংশ দাঁড়িয়েছে বলে জানিয়েছেন প্রাথমিক ও গণশিক্ষা মন্ত্রী মোস্তাফিজুর রহমান। আগামীকাল ৮ সেপ্টেম্বর আন্তর্জাতিক সাক্ষরতা দিবস উপলক্ষে গতকাল ৬ সেপ্টেম্বর বুধবার মন্ত্রণালয়ের সম্মেলনক্ষেত্রে আয়োজিত এক সংবাদ সম্মেলনে তিনি এ তথ্য জানান। সূত্র-ইত্তেফাক (পৃ.৩,ক.৮), সংবাদ (পৃ.১,ক.৬), এশিয়ান এজ (পৃ.১,ক.৪), অবজারভার (পৃ.৪,ক.১)।

১০। **বিদ্যুতের দাম ৫ শতাংশ বাড়তে পারে : বিদ্যুৎ প্রতিমন্ত্রী**

বিদ্যুতের দাম ৫ শতাংশ বাড়তে পারে বলে জানিয়েছেন বিদ্যুৎ প্রতিমন্ত্রী নসরুল হামিদ। তিনি বলেন, কিছু দিনের মধ্যে প্রতি ইউনিট (কিলোওয়াট-ঘন্টা) বিদ্যুতের দাম ৩০ থেকে ৩৫ পয়সা বাড়তে পারে। তবে বিদ্যুৎ উন্নয়ন বোর্ড (বিপিডিপি) সরাসরি জ্বালানি তেল আমদানির অনুমতি পেলে দাম নাও বাড়তে পারে। গতকাল ৬ সেপ্টেম্বর বুধবার সচিবালয়ে তিনি এ কথা বলেন। সূত্র-সমকাল (পৃ.৩,ক.১), ইত্তেফাক (শেষ পৃ.,ক.৫), অবজারভার (পৃ.১,ক.৬), ডেইলি স্টার (শেষ পৃ.,ক.৮)।

সম্পাদকীয়

- ক. **ইত্তেফাক** : হালদা নদীকে দূষণের হাত থেকে বাঁচাতে স্থানীয় প্রশাসন, সংশ্লিষ্ট বিভিন্ন মন্ত্রণালয় ও মৎস্য অধিদপ্তরসহ সংশ্লিষ্ট সকলকে একটি সমন্বিত পরিকল্পনার মাধ্যমে সক্রিয় ভূমিকা রাখার সুপারিশ।
- খ. **সংবাদ** : মধ্যপ্রাচ্যের দেশ থেকে বাংলাদেশি নারী গৃহকর্মীদের ফিরিয়ে আনতে পররাষ্ট্র এবং শ্রম ও কর্মসংস্থান মন্ত্রণালয়কে যথাযথ ব্যবস্থা গ্রহণের আহ্বান।
- গ. **প্রথম আলো** : রাঙামাটিতে পাহাড়ধসে ক্ষতিগ্রস্তদের পুনর্বাসনের ব্যবস্থা করার সুপারিশ।
- ঘ. **সমকাল** : পরিবেশ রক্ষায় স্বেচ্ছাশ্রমে তালেরচারা রোপণে রাজবাড়ীর তরুণ-তরুণীদের উদ্যোগের মতো সামাজিক উদ্যোগ বাংলাদেশের সর্বত্র গড়ে তুলতে সংশ্লিষ্টদের এগিয়ে আসার আহ্বান।
- ঙ. **যুগান্তর** : কোচিং, নোটবই, গাইডবই ও শিক্ষকের প্রাইভেট পড়ানোকে নিষিদ্ধ করে শিক্ষা আইনের নতুন খসড়ার উদ্যোগকে খুবই সময়োপযোগী ও বাস্তবধর্মী একটি পদক্ষেপ বলে অভিমত।
- চ. **ইন্ডিপেনডেন্ট** : গ্রামের তরুণদের মৎস্য ও পোলট্রি খামার গড়ায় উৎসাহিত করতে দেশের ৫৬ জেলায় অবস্থিত ৯২১টি খাল ও ১৬১১টি ছোট বড় পুকুর পুনঃখননের সরকারি সিদ্ধান্তের পরিপ্রেক্ষিতে তরুণদের মধ্যে এ বিষয়ে যথাযথ ট্রেনিং প্রদান ও প্রযুক্তিগত সহায়তার ব্যবস্থা করার ওপর গুরুত্বারোপ।
- ছ. **ডেইলি সান** : দেশে অনেক ভুয়া অস্ত্রের লাইসেন্স থাকার তথ্য উল্লেখ করে এসব ভুয়া লাইসেন্স বাতিলে যথাযথ আইনি পদক্ষেপ নেওয়ার সুপারিশ।
- জ. **নিউজ টুডে** : এইচএসসিতে অকৃতকার্য কলেজগুলোর শিক্ষাকার্যক্রম বন্ধ করে দেওয়ার পাশাপাশি অন্যান্য কলেজের শিক্ষার পরিবেশ উন্নয়নে সরকারি সহায়তা প্রত্যাশা করে সম্পাদকীয় প্রকাশ।

উপ-সম্পাদকীয়

ইত্তেফাক পত্রিকায় প্রকাশিত কলামে উল্লেখ করা হয়েছে, বাংলাদেশে আশ্রয় নেওয়া লাখ লাখ রোহিঙ্গা উদ্বাস্তু শিবিরে মানবেতর জীবন যাপন করছে যা এবারের ঈদের আনন্দকে ম্লান করে দিয়েছে।

নিবন্ধ ও ফিচার

সংবাদ পত্রিকায় প্রকাশিত ‘কিশোর অপরাধ’ শিরোনামের নিবন্ধে অভিমত প্রকাশ করা হয়েছে, বাংলাদেশের প্রতিটি শিশু শিক্ষা নিয়ে যোগ্যতা অনুসারে কাজ করার সুযোগ পেলে কখনই ওরা অপরাধে জড়িয়ে সমাজের বোঝা হবে না। বরং তারা দেশ ও জাতি গঠনে উল্লেখযোগ্য ভূমিকা রাখতে সক্ষম হবে।

#

ডালিয়া/ফাহিমা/মরজিনা/তানিয়া/২০১৭/৯.০০